

28/01/2000

Jangan guna nama saya: Pak Lah

Lichong Angkui

KOTA KINABALU, Khamis - Datuk Seri Abdullah Ahmad Badawi berharap ahli Umno yang bertanding jawatan tertentu dalam pemilihan parti Mei ini tidak menggunakan namanya atau pemimpin tertinggi untuk mendapatkan sokongan.

Menurut Timbalan Perdana Menteri, mereka yang berhasrat bertanding tidak patut mengaitkan diri mereka dengan mana-mana pemimpin atasan.

"Saya harap tidak ada yang menggunakan nama saya atau pemimpin lain. Kalau nak menawarkan diri bertanding, tandinglah... tak payah cakap disokong oleh pemimpin tertentu," katanya.

Menjawab soalan pemberita pada sidang akhbar di Lapangan Terbang Antarabangsa Kota Kinabalu sebelum berlepas pulang ke Kuala Lumpur pagi ini, beliau berkata, perwakilan boleh menilai kebolehan seseorang calon sama ada mereka layak atau sebaliknya.

Mengenai pertandingan jawatan Naib Presiden yang agak ramai sekarang, Abdullah berkata pimpinan tertinggi parti tidak boleh membuat keputusan menghadkan jumlah calon yang boleh bertanding.

"Terpulanglah kepada Umno bahagian dan Perhubungan Umno negeri... kita tak boleh memberi arahan, nanti orang kata tidak demokratik pula," katanya.

Sementara itu, Abdullah mengulangi ingatan kepada rakyat jangan mudah terpengaruh dengan khabar angin konon Datuk Seri Dr Mahathir Mohamad yang sedang bercuti di luar negara tidak sihat.

Katanya, rakyat patut mendengar penjelasan rasmi daripada kerajaan berhubung sesuatu perkara.

"Kita mahu mengingatkan orang ramai jangan terlalu sangat ambil perhatian (khabar angin). Ingat saja, kalau ada perkara seperti ini, rakyat akan diberitahu. Kalau tidak ada apa-apa kenyataan, anggap perkara itu tidak betul," katanya.

Ditanya apakah motif khabar angin itu disebarkan, beliau berkata ia dibuat oleh mereka yang tidak bertanggungjawab dengan niat tidak baik, umpamanya mereka yang ada kepentingan dalam perniagaan saham.

Menurutnya, penyebar khabar angin sukar dicari, tetapi ia tidak berleluasa sekiranya rakyat negara ini tidak mudah dipengaruhi.

(END)